

D Hannah u dr Veloahänger, Sina von Aesch

Letschte Samschtig hani d Hannah gseh. Sie isch mitem Veloahänger vom Bundesplatz Richtig Hirschegrave gfare u het nid brämset bir Ample, obwou zmingscht orange isch gsi. Wytervore hetsi de du doch müesse ahaute, wöu ds Nünitram grad agfahren isch u drum hani ihre chönne ids Gsicht luege.

Nume hurti, aber dä churz Momänt, bevor sie wieder isch ufgstange u lospedalet isch, het glängt: es het glängt, für dasi das Truurige ha gseh i ihrne Ouge. Öppis Truurigs, wo seit: so, wies itz isch, ischs nid ging gsi.

Dr Veloahänger isch läär gsi. Gnau gno zwar nid ganz läär - es het e Bung Rübli usemne voue Ichoufsack usegluegt. Aber öppis het gfäuht, das hetme gseh: dert, wo eigentlich ds Chindersitzli häreghörti, ischs läär gsi.

Dä Ablick vo däm haublääre Ahänger hetmi breicht. Zäme mitem truurige Blick usde Ouge vor Hannah heter eim schier zuegrüeft: Hie wär dr Platz vomne Ching!

Hie wär dr Platz vomne Ching.

Dä Gedanke, dä Satz isch mir no lang nachegange u ging wieder ds Sinn cho.

D Hannah isch wytergfahre u het mi sicher nid gseh, nid wahrgno. Aber ig hase gseh und ig wär gärn zuere, i däm Momänt u hätt gseit:

Liebi Hannah, hätti gseit, weni muetig wär gsi: Liebi Hannah, säg werum bisch du so truurig? Liebi Hannah, wo isch das Ching, wo eigentlich a däm Platz würd höckle? Liebi Hannah, was isch mit Dir passiert, sit das Ching nümme a däm Platz höcklet? Liebi Hannah, säg nüt, aber gäu, häb Sorg.

Au das hättire gärn gseit, weni muetig wär gsi. Aber leider binis nid, meischtens binis nid u so isch d Ample grünen worde u d Hannah isch i Sattu gstige u drvogfahre, dr haublääre Ahänger hingernache. U d Ample isch wieder rot worde u wieder grünen u d Hannah isch scho lang am Choicherpark vrbii gfare gsi richtig Loryplatz und i hase niemeh gseh.

Mängisch, weni wieder im Tram hocke u a dere Chrützig warte, dänkeni a die flüchtigi Begägnig zrugg u steue mir vor, was d Hannah hät gseit, wesi muetig wär gsi: Hallo frömdi Frou, hättsi gseit, wesi muetig wär gsi. Hallo frömdi Frou, du steusch chlei frächi Froge. Aber

frächi Froge sy scho rächt, u drum wotti dir es Stückli mitgäh vo däm, wo i mim Läbe passiert isch. Du hesch rächt, frömdi Frou, ig bi truurig. I bi so truurig, dases um mi ume dunkublau u chaut isch, ou denn, wed Sunne schiint. I bi so truurig, dases uf dr Höchi vom Härz, ganz töif inne, richtig weh tuet, so, aus würdi dert e dicke, zäihe Chlumpe us Schmärz u Angscht wohne. A deune Täg chani mis Truurige verstecke, unger schwarze Pulline u dicke Mäntle, so dass niemer frogt u niemer luegt. Aber a deune Täg ischs warm duss u de miesi dr Pulli deheime loh u dr Mantu ersch rächt u de chas äbä sy, dass öpper wie Du mis Truurige gspürt u gseht.

Mi Bueb het Samuel gheisse u är isch vor zwöine Johr deheime ufd Wäut cho. U voremne haube Johr hetim ou ke wyteri Operation me chönne häufe u kes Geschichten D Hannah u dr Veloahänger Sina / November 2017

Medikamänt, sis chliine Härz isch ds schwach gsi u het ufghört schlah. Ageborne Härfähler, heisi gseit im Spitau. Ageborne Härfähler. I hasse das Wort, ageborne Fähler. Aus hätt irgendöpper ihm ä Fähler agebore. I hasse dä Gedanke u mängisch, weni dr Chlumpe i mim Härz nüm ertrage, schreieni: Wär het mim Bueb dä Fähler agebore, säget mir, wär? Ligts ade Gen? Oder am Änd sogar a Gott? – Ig weises nid, s'weises niemer, gar niemer. Uf das gits kener Antworte, nume meh Frage, nume meh Ungwüssheit.

Sithär isch dr Ahänger läär. Ig brücht ne eigentlich nüm, aber i chane nid furt gäh, d Erinnerung fahrt mit mir mit.

Du frogsch, was mit mir sig passiert sider denn. Es git kener Wort, wo dr Schmärz chöi ifah, wöu das würd heisse, dass dr Schmärz e Gränze hätti.

Frömdi Frou, du steusch komischi Froge. U vilech chlei frächi, wöusi anders sy aus di normale, wo nach "chunnt scho guet" und "geit de scho" und "mis Biileid" töne. Merci, heschse gsteut, diner Froge. Itz bisch mr o nüm so frömd, ender fründ. Wöu mir hei nid e Gschicht tuuschet, sondern mini teilet. Das duet guet.

Vilech hätt d Hannah so gantwortet, weni se hätt gfrogt. Vilech hätt si so gantwortet, wenn mir beidi wäre muetig gsi.